

11 JUN 1996
Perutusan-Filipina
AGONG UTUS TAHNIAH KEPADA RAMOS

KUALA LUMPUR, 11 Jun (Bernama) -- Yang di-Pertuan Agong Tuanku Ja'afar mengutus ucapan tahniah kepada Pres Fidel V. Ramos sempena ulang tahun ke-98 Perisytiharan Kemerdekaan Filipina esok.

"Beta dan Raja Permaisuri Agong Tuanku Najihah mengucapkan tahniah kepada Tuan Yang Terutama dan rakyat Filipina ... dan yakin Filipina akan terus menikmati kemajuan dan kemakmuran di bawah bimbingan Tuan Yang Terutama Presiden," titah Seri Paduka.

Seri Paduka juga bertitah yakin hubungan dan kerjasama yang erat antara Malaysia dan Filipina akan berterusan pada tahun-tahun akan datang.

Perdana Menteri Datuk Seri Dr Mahathir Mohamad dalam perutusannya kepada Ramos yakin keamanan berterusan dan kemajuan akan terus dinikmati oleh rakyat Filipina di bawah pimpinannya.

Beliau berharap asas kukuh yang telah dibina sekian lama antara kedua-dua negara akan berkekalan dan terus membuahkan hasil.

Perdana Menteri yakin, peningkatan perdagangan dan kerjasama ekonomi antara Malaysia dan Filipina akan membawa keuntungan bersama, keharmonian dan kebahagiaan berterusan kepada rakyat kedua-dua negara.

Menteri Luar Datuk Abdullah Ahmad Badawi dalam perutusannya kepada rakan sejawatannya Domingo Siazon Jr berharap Malaysia dan Filipina akan terus bekerjasama untuk mengukuh dan mengeratkan hubungan bagi faedah bersama.

-- Bernama
HT AHH